

**Ilay Voa Tsara Nafafy 24
Marsa 2020**

Voahombo miaraka amin'i Kristy amin'ny hazofijaliana aho, ary tsy izaho intsony no velona, fa Kristy no velona ato anatiko ; fa izay ivelomako ankehitriny eo amin'ny nofo dia ivelomako amin'ny finoana ny Zanak'Andriamanitra, Izay efa tia ahy ka nanolotra ny tenany hamonjy ahy. Galatiana 2. 20

Nandray fanapahan-kevitra aho

Ny lahatsoratra etsy ambany dia avy amina kristiana tsy fantatra iray. Lahatsoratra maneho hafanam-pon'olona vao niova fo.

„Nandray fanapahan-kevitra aho, nisafidy ny antoko hia-rahako. Miaiky aho : nanjary mpianatr'i Jesosy Kristy aho ! Voavotra ny lasako, azo antoka ny ankehitriniko, voamana ny hoaviko. Tsy hihemotra intsony aho : nohomboana ny fiainako taloha, nohamasinina ny fiainako vaovao. Tsy mandeha amin'ny fahitana intsony aho, fa amin'ny finoana ; tsy anaty fanamelohana intsony, fa anaty fanafahana ; tsy ao amin'ny haizina intsony, fa ao amin'ny mazava. Tsy migadra intsony aho, fa nafahana, ka miroso hatrany !

Niara-niainga tamin'i Kristy aho teo amin'ny hazakazaka atao, feno hery satria Izy no manafaka ahy amin'ny fahalemeko, feno fanantenana satria Izy no manafaka ahy amin'ny famoizam-po, feno finoana satria Izy no manafaka ahy amin'ny fisalasalana, feno herim-po satria Izy no manafaka ahy amin'i Satana. Nanomboka teo aho dia nanam-patokiana, nohavaozina ny saiko ; hanana eritreritra masina aho, hilaza teny marina... Novidina lafo aho, nasiana tombo-kase tamin'ny Fanahy Masina, ary nanjary mpandova ny fanjaka-na.”

Hoy ny Baiboly, mameno izany fijoroana ho vavolombelona izany :

„Raha tsy ateraka indray ny olona, dia tsy mahazo mahita ny fanjakan'Andriamanitra... Tsy maintsy hateraka indray ianareo” (Jaona 3. 3, 7).

„Fa fony mbola tsy nanan-kery isika, dia maty Kristy ... hamonjy ny ratsy fanahy” (Romana 5. 6).

„Raha misy olona ao amin'i Kristy, dia olom-baovao izy ; efa lasa ny zavatra taloha, indreo, efa tonga vaovao ireo” (2 Korintiana 5. 17).